

Expediente IET: P-20-193
Proxecto: Parque eólico Solpor
Concellos: Mesía e Ordes (A Coruña)
Promotor: Green Capital Power, S.L.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 18/10/2022 o Servizo de Enerxía e Minas da Coruña da Vicepresidencia Primeira e Consellería de Economía, Industria e Innovación, somete a informe do Instituto de Estudos do Territorio (IET) documentación relativa ao proxecto Parque eólico Solpor.

1. Antecedentes:

O IET emitiu informes sobre este proxecto con datas do 06/05/2020 e 28/01/2022, no marco do procedemento de avaliación de impacto ambiental ordinaria.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia, aprobado polo Decreto 96/2020, do 29 de maio (RLPPG).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do RLPPG.

3. Análise do EIIP, dos efectos do proxecto sobre a paisaxe e das medidas de integración paisaxística:

A documentación que se somete a informe consiste nun escrito de data 11/10/2022, xunto cun novo EIIP (data de outubro 2022, asinado o 10/10/2022).

O proxecto presenta modificacións respecto ao informado polo IET o 28/01/2022. Os cambios máis salientables son o desprazamento do aeroxerador SOL-04, uns 340 metros ao sueste da posición SOL-05 a cal se despraza tamén cara ao sueste uns 75 metros; e unha nova localización da subestación (uns 450 metros en dirección oeste) provocando a modificación do trazado da liña de evacuación que mantén o mesmo número de apoios para unha lonxitude de 1.042 metros (anteriormente era de 709 metros). Tamén se producen cambios na orientación da plataforma do aeroxerador SOL-03 e na posición da torre meteorolóxica, que se despraza cara o oeste para dispoñerse próxima ao SOL-01.



O EIIP non difire substancialmente do que fora informado anteriormente por este organismo, agás que o contido se adapta ás modificacións do proxecto, realízase unha análise dos efectos acumulativos e sinérxicos, incorpórase un apartado coa xustificación do cumprimento das Directrices de paisaxe e se inclúe, como medida compensatoria, unha proposta detallada de plantacións con especies autóctonas (bidueiros e carballos) nas proximidades dos núcleos para mitigar o impacto visual das infraestruturas.

Os cambios realizados no deseño do parque non supoñen unha alteración substancial dos impactos sobre a paisaxe, polo que os seus efectos serán os que xa se valoraron en anteriores informes, en especial no do 28/01/2022.

En canto ás medidas de integración paisaxística recollidas no EIIP, estas poden considerarse adecuadas para reducir ou mitigar os impactos sobre a paisaxe.

4. Conclusión:

O EIIP é completo e seu contido axústase ao disposto no artigo 11.2 da Lei 7/2008 e nos artigos 26 e seguintes do RLPPG.

O principal impacto paisaxístico deste proxecto será a incidencia visual dos aeroxeradores, que pola súa forma e altura serán visibles desde unha ampla extensión de terreos e a longas distancias; esta incidencia perdurará durante o tempo no que estean instalados os aeroxeradores, e se verá incrementada polo efecto sinérxico derivado da presenza doutros parques eólicos na contorna. Neste caso, entre as zonas afectadas pola incidencia visual caben destacar os núcleos rurais máis próximos, o Camiño de Santiago, o sendeiro PR-G 177 Ruta das Fragas aos Muíños, e a autoestrada AP-9. Aínda que non é viable ocultar ou apantallar os aeroxeradores desde a maioría dos puntos de observación (agás nos núcleos rurais), esta incidencia visual non supón (para os efectos do artigo 33.1.d) do RLPPG) un impacto crítico. A respecto dos núcleos rurais, considérase adecuada a medida recollida no EIIP, relacionada coa directriz de paisaxe DX.20.c, de prever a execución de pantallas vexetais nas proximidades dos núcleos de poboación.

En relación ao edificio de control, e de acordo coa directriz de paisaxe DX.17.c.4, deberase procurar a mellor integración cromática e textural posible seleccionando os materiais e as cores en atención ás características da paisaxe de acollida, coidando os acabamentos para transmitir unha imaxe de calidade. En calquera caso evitárase o emprego de materiais que afecten negativamente á paisaxe pola súa cor, brillo ou similares. Así mesmo, de acordo coas directrices de paisaxe DX.20.i e DX.20.o, deberánse prever plantacións arbóreas ao borde da instalación, realizadas con especies autóctonas, que suavicen a súa incidencia visual.

En todo caso, de acordo co artigo 30.3 do RLPPG, as medidas de integración paisaxística deberán quedar oportunamente recollidas no proxecto.

Non será necesario solicitar un novo informe do IET.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

